

德縣志

纂修 民國二十四年

72199
:9

卷九

宦蹟志

政績

職官表

中140.149
42
部三九

德縣志卷九

政績

職官表

五方之福利賴夫賢明之吏治吏治者所以繫人心維風化保庶民奠邦國故史家有循吏之傳邑乘有宦蹟之錄也德邑當漢晉南北朝之時嘗爲平原郡屬郡之良吏若蕭望之等之爲平原守史弼等之爲平原相匡衡陸機等之爲平原文學爲平原內史隋唐以下亦代有其人而所謂德州者乃今之陵縣在當日此地或屬與否要非守相親蒞之邦蕭伏諸公猶遜清之濟南太守而已邑焉用志然而元首聖明全國蒙庥守相賢良合屬沾惠又烏可以不志原金志採錄之心蓋以彰有德而紀有功今是編仍列之意亦以重賢明而資激勸許虹橋州志附論有云志乘宜公有舉

德縣志卷九

宦蹟志

政績

莫廢矧蕭伏等久已秩祀名宦奚得不復爲敘錄乎逮自元明以來疆土確定名賢時出或職居衝劇有治辨之稱或政在撫綏有仁明之頌遺愛聞於子產廉平著於吳公桐鄉郭外猶存朱邑之祠益州館中尙設文翁之祭皆足以繫謳思垂後世之楷式者矣民亦勞止迄可小休王風衰亂之後獨誦大車周雅勞苦之餘更思黃鳥過蒲而稱三善邈矣其人入晉而問繭絲難於異日彼表鄭國輿人之歌續子長循吏之傳亦所以勸今而救世也若乃職任分曹題名表列志家之例不敢闕遺論世知人存乎達者此宦蹟志之所以作也

德縣志卷九

宦蹟志

政績

職官表

政績

漢

蕭望之東海蘭陵人宣帝地節中爲諫議大夫時上選博士諫官通政事者補郡國守相以望之爲平原太守徵入守少府拜御史大夫罷爲皇太子太傅宣帝崩受遺詔輔政領尙書事

匡衡東海承人宣帝時射策甲科除太常掌故補平原文學學者多上書薦衡經明當世少雙不宜在遠方太傅蕭望之亦奏衡經學精習說有師道可觀宣帝不甚用儒遣歸元帝卽位官至丞相伏湛瑯琊東武人更始初爲平原太守時天下驚擾而湛獨晏然

德縣志

卷九

宦蹟志

政績

教授不輟又念歲饑悉分俸祿以賑鄉里時門下督謀爲湛起兵湛立收斬之於是人心信向郡內以安平平原一境湛所全也光武卽位徵爲尙書典舊制

吳漢南陽宛人官大司馬擊清河及平原皆下之鬲縣五大姓共逐守長據城反諸將欲攻之漢不可曰使鬲反者皆守長罪也敢輕冒進兵者斬乃移告諸郡收守長而使人謝城中五姓五姓喜相率歸降諸將拜服曰不戰而下城非衆所及也

趙熹南陽宛人光武時遷平原太守境內多盜熹與諸郡討捕其渠帥餘黨當坐者數千人熹奏徙京師近郡帝從之於是推舉義行誅鋤姦惡後青州大蝗侵入平原界輒死歲屢有年百姓歌之史弼陳留考亭人桓帝時爲平原相詔舉鈞黨郡國所奏多至數

百弼獨無所上詔書迫切從事坐傳詰責弼曰先王疆理天下水土異齊風俗不同他郡自有平原自無何可相比從事怒舉奏弼會黨事解全活者千餘人

陳紀潁州許人獻帝時爲平原相時董卓欲徙都長安紀以爲不可卓敬紀名行欲拜爲司徒紀見亂禍方作不就卽之郡

劉先主備獻帝時爲平原相是時人民饑饉屯聚抄掠備外禦寇難內豐財施士之下者必與坐食衆多歸焉

魏

孫禮涿郡容城人建安末爲平原太守及魏正始中清河平原爭界八年更二刺史靡能決太傅司馬懿諮禮治之禮言當取烈祖初封平原時圖驗之可於座上決也懿從之禮按圖宜屬平原曹

德縣志卷九

宦蹟志政績

三

爽信清河言不用圖禮爭之力忤爽落職

晉

阮种陳留尉氏人文帝時遷平原相爲政簡惠百姓稱之

邵續魏郡安陽人惠帝末王浚假續樂安太守綏懷流散多歸附之尋以兵屬元帝以敗石勒功拜平原樂平太守後爲石虎所圍續出戰被執見勒不屈勒初敬禮之尋遇害

陸機吳郡人永寧初中原多難以成都王穎賢遂委身焉穎以機參大將軍軍事表爲平原內史

辛穆隴西狄道人永寧中爲平原相廉正無私子馥後亦爲平原相有學行吏民懷之

後魏

房士達清河繹幕人起家濟州左將軍倉曹參軍補騎軍參軍孝昌中以平劉蒼生等功就家拜平原太守抑挫豪彊境內肅然時邢杲寇亂憚其威名越城西度不敢攻逼

隋

房恭懿河南洛陽人開皇初除新豐令政爲三輔最累遷德州司馬在職歲餘政爲天下最上賚賜優厚令天下朝集使咸師數之進持節海州諸軍事海州刺史

唐

陽 嶠河南維陽人儀鳳中授將陵尉累遷尙書右丞魏州刺史兗州都督荊州長史入爲國子祭酒封北平伯嶠恭謹好學勤於政理常謂人曰吾雖位登方伯而心不異於曩時識者甚稱歎之卒

德縣志 卷九

宦蹟志 政績

四

諡曰敬

韓思復開元初爲諫議大夫山東大蝗宰相姚崇遣使捕瘞思復上言宜悔過責躬以答咎譴其驅蝗使乞一切罷之崇惡之出爲德州刺史

張知謩幽州方城人調露時知謩以監察御史出知德州政令威嚴吏民不敢犯武后降璽書存問及入計后奇其貌詔畫工圖之

韋安石京兆萬年人永昌中拜德州刺史性方重不苟言笑政尙清嚴吏民尊畏久視中遷文昌左丞鸞臺侍郎同平章事

顏真卿天寶末爲平原太守知安祿山且反因霖雨完城浚濠糾丁壯實倉廩及祿山反真卿遣司兵李平間道奏之平至上大喜曰朕不識真卿乃能如是真卿使親客密懷購賊牒詣諸郡由是多

應者召募勇士諭以舉兵討賊士皆感憤又執逆黨段子光腰斬以徇山東諸郡共推真卿爲盟主軍聲大振

後晉

梁 進官沿河巡檢開運元年契丹遣將陷德州進以鄉社兵復之

宋

趙挺之密州諸城人進士上第熙寧初通判德州哲宗卽位賜士卒緡錢郡守貪羣不時給士卒怒持白挺入府守趨避左右皆走挺之坐堂上呼問狀立發庫錢而治其爲守者衆卽定郡賴以安趙叔皎秦悼王四世孫元豐中爲德州兵馬都監自靖康以來劉順呂拱劉亨相繼謀叛叔皎皆設方略捕擒之建炎二年金人圍城城陷叔皎猶力戰勢窮被執怒罵不屈死之

德縣志

卷九

宦蹟志 政績

五

靳懷德博州高唐人太平興國中知德州悉心撫治頗著政績契丹入掠懷德固守城壁轉運使劉通言其善政連有詔褒之

唐 介江陵人通判德州轉運使崔嶧取庫絹配民而重其估介留牒不下且移安撫司數之嶧怒馳檄按詰介不爲動旣而果不能行入爲監察御史裏行轉殿中侍御史以戚畹張堯佐驟遷宣徽使抗言爭之仁宗怒貶春州別駕直聲震天下

司馬池字和中夏縣人舉進士授永寧主簿歷建德尉調鄭州防禦使所蒞皆有異績召知諫院遷尙書兵部員外郎兼侍御史擢天章閣待制出知杭州爲轉運使江鈞張從革所劾降知德州會人持鈞革私弊告池舉劾報仇池曰吾不爲也人稱其長者

金

曹望之字景蕭大德初以戶部侍郎出爲德州防禦使有惠政百姓爲立生祠望之有詩集三十卷

王 擴中山永平人明昌五年除同知德州防禦使被詔賑貸山東西路饑民擴輒限數外給之泰和中山東盜起出行道中遇一男子舉止不常捕訊果歷下大盜也衆服其神明

元

杜 明官陵州知州政平訟理吏不敢欺建學宮置祭器課生徒勤講肄以身先之風化大行

齊八元官學正與杜明同時謝絕人事盡心訓迪弟子日衆成材者甚多

廸哩彌實官河間總管延祐四年悉收陵州羣兇之爲官民害者繫

德縣志

卷九

宦蹟志

政績

六

死獄中

崔 敬官中書參知政事至正十七年山東毛貴田豐等作亂據東昌敬與平章達蘭參知諸達分省陵州陵州乃南北要衝無城郭居民散處敬兼領兵刑戶工四部供給諸軍事無不集乃又以民力日疲請行納粟之令以集軍費民獲少甦

按崔傳係照王志抄錄原文其中無城郭一語本於元史崔公本傳而李東圃先生州志考異力駁之詳見輿地志城郭條

明

韓 觀官都督建文元年命觀練兵於德州秋李景隆合兵五十萬討燕築十二連城於城東北以護倉儲

盛 庸官都督鐵鉉官參政建文二年五月燕將陳亨等陷德州八

月庸鉉復之

何 原官德州知州永樂九年移壇壇建城隍廟

宋 禮官治河尚書永樂九年疏會通河入土河開四女樹減水河
曹 得官都督在任六年軍民安之

韋景元官德州知州正統八年景元修州城建譙樓修學宮任滿擢
本府同知州民乞留任又五年始升任去

鄒 銘官德州知州正統十三年修學宮

洪 釗官德州知州景泰五年修學宮始編志稿

楊 愷官德州知州成化八年修學宮

王 縉邢臺貢生官德州知州成化九年建鄉賢祠成化二十年開
東南大路縉建大橋由黃河涯赴曲陸店又建土橋於界河在任

德縣志

卷九

宦蹟志

政績

七

十餘年與百姓相安加四品服俸

韓 熙官德州州同上官知其廉幹數委以事清伍運糧訊冤賑飢
事皆有濟

甯 河通州進士官德州知州正德五六年間禦劉六劉七之變安
戢民衆捍守有方州境不擾民得安堵

桂 勇官守備正德六年流寇數萬壓境勇勒兵嚴備洞開城門市
肆貿易如故賊疑不敢入勇復以數十騎繞賊後偵知虛實乃乘
夜發伏縱擊之斬獲無算餘賊大懼解散去州中藉以安堵時知
州甯河同心協力相資如左右手故事事有功

王 翊官德州知州正德十六年修學宮

何 洪官德州知州嘉靖七年大修羅城廣袤二十餘里

戴 纓如皋舉人官德州知州舉荒政定力征州人懷之

陳秉忠官德州知州嘉靖二十四年修學宮建名宦祠

邢 奎黃梅舉人官德州知州善政多端風采獨持嘉靖四十五年修學宮

趙時春平涼進士官武德道文章政事迥邁一時

趙梧岡官錦衣衛指揮嘉靖間德州河決奉遣治水有功

唐文華懷慶舉人官德州知州萬歷四年始修州志

宋明德祥符舉人官德州知州清勁有力不畏強禦州人思之

劉 道官德州知州萬歷二十五年修學宮建文昌閣

謝錫教海鹽舉人官德州知州爲政不煩公堂清暇以廉介自持官無長物

德 縣 志 卷九

宦蹟志 政績

八

黃克纘官山東巡撫疏罷增餉四十萬命署德州知州孫森重修德州城

傅賓鳳晉江進士以戶部主事司德州倉倉有大小二量乃剖其大者收納如額輸者無留難一切峻削之政悉罷去兼司稅務及額而止支給中度軍衛士民皆感悅

孫 森慈谿舉人萬歷四十年以濟南同知署德州知州時州城傾圮衆憚於謀始森毅然任之初計以三年爲期錙需五萬森隨宜擘畫增陴濬隍登以磚石建雁塔振河閣敵樓戍舍無不周備城外築廻龍壩期月而成省費四之一工既竣以勞積疾致仕州人祀之

馬明瑞平湖舉人官德州知州下車伊始百廢俱興旣集諸生月課

梓其藝曰崇仁會課已乃築堤護河作閘於其下流又移建董子祠於河上爲醇儒書院在任五年升安慶同知撫按交章題留改濟南同知仍管德州事者又三年

馬維騶陽曲進士以戶部主事司德州倉寬嚴得宜時援朝鮮事急議借德庾充餉衆未敢定騶投袂而起以便宜發數十萬石師得宿飽人服其果敢任事

宋師程永年進士以戶部主事司德州倉始至敝衣糲食盡斥蠹役庾政爲之一清

焦源清三原進士以戶部主事司德州倉廉介有名與宋公埒

阮自華桐城進士以戶部主事司德州倉瀟灑簡靜吏民安之

來斯行官武德道天啟二年白蓮教于宏志作亂於白家屯斯行率

德縣志

卷九

宦蹟志 政績

九

州兵會同天津景州兵搗巢剿滅之

安受善邯鄲舉人官德州知州和平簡易與民相安天啟五年重修州志六年修學宮

周天永官德州守備天啟間山海潰卒南下所在剽掠天永設伏擒斬殆盡境內無患

郭時亮富順舉人官德州學正儒雅恬靜講課有方克盡厥職

李應元開州舉人官德州知州居恒談笑可傾一座猝遇糾紛疑難迎刃而解卽責育不能奪也

馬 曠官參將鎮德州時有深衡大盜賈邦煥糾黨數百攻劫王官店諸村曠率數十騎直前左右馳射斃賊三十八人遂潰去不敢窺州境

雷績祚江南舉人官武德道丰采矯矯不畏強禦值總督范至完趙光忭戢下不嚴所至縱兵淫掠績祚上疏劾之二督坐斬

清

祝思信官武德道劉思文官德州知州順治四年平原賊張二幌子祁和尚唐喝子等作亂十一月中潛入州城劫道庫旋赴州署劉思文率其姪劉珍甥蔡經邦射中賊首賊逸祝思信率兵追至黃河涯殲滅之

梁維樞真定舉人官武德道淳誠無僞樂易近人政持大體不責苛細每屬吏上謁輒霽顏諮詢使各盡其懷間有不稟教者卽糾劾不少貸吏民畏而懷之

劉源湛新鄉進士官武德道清慎勤敏御下有威稍涉貪墨銖兩必

德縣志

卷九

宦蹟志 政績

1

罪巡撫檄署按察使時東省奸民叩閭刁訟者案牘填委源湛精心訊讞被誣陷者悉原之矜全數百人以是積勞嘔血卒於官喪歸之日行李蕭然道路莫不流涕

劉國楨福州恩貢官德州知州寬和簡易深得民心以累謫去職士民遮道祖餞涕泣如雨楨豪於飲人人舉觴咸爲卒爵攀留者三日及發淚點酒痕斑斑衣袖間也

劉興白定陶貢生官德州學正潔己率人甚著師範勸士以實行人咸服其教饒有鹿洞鵝湖風範

劉芳聲以山西冀寧道謫知德州性剛斷明察不容人過奸胥猾吏侍左右凜凜若負冰霜無敢萌私念者素善病臥治簿書事皆就理徵收錢糧不責羨加羨者輒返之一切雜派陋規革除殆盡

金祖彭官德州知州康熙十二年重修州志州人程先貞撰輯稱盛一時是年并修學宮

佟淮年官德州知州康熙十七年建義學修浮橋建奎樓建董顏祠徐宏業官山東督糧道時初移駐德州政聲不著又極愛才重士擇舊家子弟讀書署中延陶紫笥孫義山兩先生爲師多所成就名重儒林

吳軫武進進士官德州知州康熙二十九年御河淤軫與紳士捐銀僱夫挑淺水不爲災

許嗣國官德州知州康熙二十三年清理民間寄名糧地三十四年查造失業戶册絲毫無遺積弊一清

王朝佐官德州知州康熙四十四年建議免徵淺夫

德縣志卷九

宦蹟志 政績

十一

朱廷楨官山東督糧道釐奸剔弊庾政廉平康熙四十八年建柳湖書院文風丕振

藍昌後卽墨舉人官德州學正以德廸人善於訓士每月必三課典衣爲饌寒暑無間州人助之則具酒食勞優者士以是勸及卒甑釜蕭然不能歸里士無貧富爭致賻焉

李樹德官山東巡撫康熙五十七年築磚堤於德州小西門外碑碣至今猶存名李公堤

甘士調官德州州同頗有才幹倜儻不羈善指畫最得高尙書其佩遺法

余甸南平進士雍正元年以陳鵬年薦擢山東督糧道策蹇之任盡革貪墨之政聲名大振未三月以他事去職民奔走罷市痛哭

挽留供應薪水米菜以給其家及赴豫質審民跋涉至濟南餞送者數百人後事得白陞任按察使

西勒塔官德州城守尉駐防滿兵初頗擾民而不節於用往往患貧塔履任後爲之嚴禁經理周匝營卒初苦其嚴久而兵民相安人無奢費家多溫飽於其去也皆哭送之

陳留武奉天舉人官德州知州革從前一切弊政訊讞一時無兩審詞用木皂催糧用紙皂故民不擾雍正二年修學宮三年建崇聖祠節孝祠關廟四鄉皆立義學歲稔開倉減糶設糜施賑旁及近縣均沾實惠後以戶口溢額太多坐虧空免官被逮之日州民罷市哭送巡撫岳濬面奏其才復起爲臨清州知州

陳世倌海寧進士官山東巡撫雍正五年全裁淺夫

德縣志

卷九

宦蹟志 政績

十一

湯豫誠睢州進士尙書湯斌族孫也初令海豐獨以清操顯著一時雍正中累擢督糧道廉介有爲人僉謂其不愧文正遺風

廣 壽官山東督糧道於雍正十二年捐己貲置義田一頃四十九畝一分三釐入普濟堂收養貧民

王朝選官濟南糧捕通判駐德州性剛直尤有廉名州縣民控於大府者輒求下王判府以其平而明也

許佩璜官德州州同博學能詩喜與文人交士大夫多稱之深心人別有懷抱耳

趙 城通海進士官山東督糧道簡重安和無裨政無廢事遇士以禮御屬以誠乾隆四年重修學宮遴委太學生杜無逸董其事概不令吏胥涉手故歷久不敝最稱堅完課士專講理學望丰采者

皆欽爲先正典型

蔣尙思官德州知州時吏治澄清往往有務爲刻覈者尙思獨明慎和平不爲赫赫名去後人益思之

周紹涑膠州歲貢生官德州訓導正以持已莊以接人文章一宗先正士林服之

劉元錫永寧進士官德州知州乾隆八年發帑修城以工代賑元錫悉心經理十年訖工報銷

朱若炳臨桂進士官德州知州誠心愛民幾於無訟公餘集生童講課文藝乾隆十六年辦理南巡大差全不假手胥役親與父老約不傷財不擾民而事無不就理行在召見特遷九江知府

黃登穀宛平進士叔琳先生次子也官德州知州秉父教以敷治遇

德縣志卷九

宦蹟志 政績

十三

州士大夫禮最隆而廉隅亦最嚴日坐大堂訟者曲直立判

汪漢倬歙縣貢生官山東督糧道乾隆十六年創建繁露書院延名師設膏火令生童肄業其中一時文教丕振

顏希深連平貢生官山東督糧道清操自勵署內皆布衣糲食乾隆二十六年河水爲災督率文武極力捍禦以保城池倉庫而民無滋擾

楊成龍大同拔貢署德州知州值州大水民間器物隨水漂流有無賴棍徒駕船搶掠成龍親莅災所立拿究治無賴斂跡百姓安之徐世恩官德州營守備乾隆二十六年大水城磚浸沒二十餘層各門皆屯土以衛忽西門內水從溝突出勢如泉湧軍民驚惶無措世恩首先入水解衣塞隙蹲坐其上旋堅築之時綠旂滿營兵丁

及左右居民無不從而力爲堵塞始得無害

石之珂漢軍進士官德州知州政尚嚴明案牘不煩冬月捐廉施衣粥每徵糧察有貧乏老疾力不能完者軫恤頗至

單 維高密廩貢生官德州訓導單本望族出家學以教人論文不蹈恒蹊月課外更有以文社就正者士咸悅服成名者多著有周易孝經註

李 燕洛陽進士官德州知州渾厚精明謹慎勤敏案無留牘多所平反乾隆三十九年逆匪王倫作亂州兵大半調發城守單弱燕廣募民夫躬率稽巡晝夜不懈京兵過境一切供應調度有方事不煩而民不擾州境內如無事焉陞任濟南知府四十一年南巡屢蒙召見嘉許尋擢濟東道

德縣志卷九

宦蹟志 政績

十四

曹錫寶上海進士官山東督糧道庾政廉平振興風雅州舊有繁露書院特延名師勤考課一時士子蒸然服教育嬰堂久缺經理爲捐廉俸以倡得置地三頃六畝一分八釐至今貧民賴之

敷倫泰由戶部郎中出知兗州府擢督糧道清操冰雪敝衣糲食有寒素所不堪者下游餽送杜絕淨盡甫蒞任卽嚴查漕政陋規積弊將力爲釐剔及開徵大吏檄調至省另委辦理差務旋即劾去升沉榮辱淡如也及遷主事入都止馬一騎行李蕭然

劉永銓官德州知州安靜無擾爲政有方乾隆四十四年捐俸倡修學宮及奎樓

王道亨字應亭江蘇吳縣人副貢乾隆五十三年權知德州事時州志失修已閱百十五年之久與其事者每以所學不同所見各異

各執己見互相齟齬致以文獻所關延悞無成尤堪惋惜道亨莅任後洞悉情形力爲解釋虛心採納未幾而聿觀厥成其大有造於德者至今稱之

原遜志字可亭陝西蒲城人進士嘉慶四年由臨邑縣調升德州知州以德化民在任八年未嘗用刑杖犬不夜吠民不識吏廳事前蓬蒿滿徑時人題其座右云一春有兩年將稔三役無權夜不驚居恒布袍方履巡行田野民有疾苦若切肌膚多方除之而後已孫淵如觀察聞之歎曰若原牧者可謂真愛民矣後卒於官士庶哭之皆失聲易簣時訓其子曰吾作官來自問尙無大罪惡未嘗自置產業未嘗爲子弟捐官歲寄家不過數十金補葺房屋一身不敢枉費今以書生終老豈不幸甚尋其子扶櫬歸里行李蕭然

德縣志

卷九

宦蹟志 政績

十五

其廉介可知崇祀名宦祠

孫星衍字淵如江蘇陽湖人乾隆丁亥進士以一甲第二名授編修博學工書而尤精篆法嘉慶十年調補山東督糧道正值衛河上游經臨清開口夏秋之際水漲高於閘內之水閘卽閉謂之閘口時糧艘阻滯知恩縣四女寺舊有支河入老黃河故道經樂陵至海豐入海年久淤塞請開濬以洩衛河之水以滿營駐防兵工作之事不妨農民樂利焉辦理漕務積弊一清仁民愛士懷德畏威名臣碩儒端此風度崇祀名宦祠

汪爲霖字傳三江南如皋人由貢生官刑部郎中嘉慶元年初任山東兗州府知府十三年權山東督糧道德州倉積粟黷變乃籌以新易舊之法以價之贏餘調劑民困而倉儲藉以無虧歷任各官

均免吏議

汪玉林號樸菴安徽霍山人乾隆乙卯進士由工部郎中嘉慶十五年授山東督糧道兩值荒旱請緩征急賑體恤軍民俾令實惠均霑時東省教匪案起德州衛守備朱廷蘭爲人誣指獄已成矣汪察其枉力爲申請專奏改刑部質審得昭雪復職一家數十口獲全當時稱其辦事精明操守廉潔特疏薦之

徐紹薪字丹樵直隸撫寧舉人嘉慶七年權諸城縣值旱蝗與城官屬分鄉督捕蝗不爲災調陵縣陵與章邱在濟屬漕賦獨重有一馬負所輸米一斗而不足者乃下令正供若干耗羨若干皆以公量輸於倉除淋尖溢席盤驗手抄諸弊民大稱便十六年由膠州調知德州十八年九月直隸河南教匪起德州地當孔道兵差絡

德縣志卷九

宦蹟志 政績

十六

繹羽檄飛馳皆手自批答晝則訓練鄉勇夜則登城巡查察獲林清餘黨宋躍漕等十餘人於故城獲滑縣酋士馮克善於河間時大學士托津駐軍大名聞德州有匪徒蠢動將撥兵剿辦紹薪請以身家保闔境無滋事者議遂寢擢臨清牧後署兗州守濟南守濟甯牧所至增書院膏火士之貧乏者周濟之罷官日家無儋石惟書籍數簾而已盧文肅謂爲體用兼備之才惜所施未竟

邵元章字米升安徽休寧人由河南淮寧令改官山東道光元年署德州知州控案隨到隨結民咸服之運河水漲培堤築埝捐資濟事以免墊溢又值時疫流行散給丸散全活無算官至知府

傅士奎字瘦石浙江會稽人道光初年知德州事聽斷明決人不敢干以私在官七年百姓安堵有傳青天之稱